

晉記卷二十七

列傳

王丞相導

蕭山郭倫撰

王丞相導字茂宏光祿大夫覽之孫也父裁鎮軍司馬導年十四陳畱高士張公見而奇之曰將相之器也初襲祖爵卽邱子自司空東閣祭酒遷祕書郎太子舍人不行參東海王越軍事元帝爲琅邪王與導素相善導見天下已亂遂傾心推奉陰有興復之志王在洛陽導恆勸歸國王出鎮下邳遂請導爲安東司馬軍謀密策知無不爲永嘉元年王徙鎮建康居

月餘名士莫有至者。導患之王敦來朝。導謂敦曰。琅邪王仁德雖茂。而物望未歸。兄威風已振。宜有以匡濟者。盍畱此以重王乎。三月上巳。王親觀禊。乘肩輿。具威儀。敦導及諸名碩皆騎從。吳人紀瞻。顧榮竊覘之。見其如此。乃相率拜於道左。導因說王曰。古之王者。莫不賓禮故老。存問風俗。虛己傾身。以招俊乂。況天下喪亂。九州分裂。大業草創。急於得人者乎。顧榮賀循。南士之望。宜引之以結人心。二王既至。則無不來矣。王乃使導造榮。循。通殷勤。二人皆應命。由是吳會風靡。百姓歸心焉。洛陽傾覆。中州人避亂渡江者。

十六七導勸王收其俊彥。與圖政事。辟掾屬百餘人。謂之百六掾。當是時。荆揚晏安。戶口殷實。導爲政。務在清靜。朝野傾心。號爲仲父。王曰。茂宏。吾之蕭何也。永嘉末。遷丹陽太守。加輔國將軍。愍帝卽位。徵吏部郎。不拜。晉國建。爲丞相軍諮祭酒。桓彝初過江。見朝廷微弱。謂周顗曰。我以中州多故。來此求全。而寡弱如此。將何以濟。憂懼不樂。旣而見導。笑謂顗曰。向見管夷吾。無復憂矣。暇日。諸名士共出新亭宴飲。周顗中坐而歎曰。風景不殊。舉目有江山之異。因相視流涕。導愀然變色曰。諸君當共戮力王室。克復神州。

何至作楚囚對泣耶。衆收淚而謝之。於時學校不修。導乃上書曰。夫風化之本。在於正人倫。人倫之正。在乎設學校。學校設。五教明。父子兄弟夫婦長幼之序。順。而君臣之義固。易所謂正家而天下定者也。故自古聖王。蒙以養正。少而教之。習以性成。使人遷善遠罪。而不自知。行成德立。然後裁之以位。雖王之世子。猶與國子齒。使知道而後貴。其取才用士。咸先本之於學。故禮鄉大夫獻賢能之書於王。王拜而受之。所以尊道而貴士也。人知士之貴。由道存。則退而修其身。以及家。正其家。以及鄉。舉於鄉。以登朝。反本復始。

各求諸己。敦朴之業著。浮僞之競息。教使然也。自頃
皇綱失統。頌聲不興。於今將二紀矣。傳曰。三年不爲
禮。禮必壞。三年不爲樂。樂必崩。而況如此之久乎。先
進忘揖讓之容。後生惟金鼓是聞。干戈日尋。俎豆不
設。先王之道彌遠。華僞之俗遂滋。非所以端本而靖
末也。殿下以命世之資。屬陽九之運。禮樂征伐。翊成
中興。誠宜經綸稽古。建明學業。以訓後生。使文武之
道。墜而復興。俎豆之儀。幽而更彰。昔有虞氏舞干戚
而化三苗。魯僖作泮宮而服淮夷。桓文之霸。皆先教
而後戰。方今戎虜煽熾。國恥未雪。忠臣義夫。扼腕拊

心莫若聿遵前典。興復五教。選明博修禮之士。以爲師。擇朝之子弟。竝入學。使化成俗。定淳風。漸著獸心。革面饗饗。檢情揖讓。而四夷服。垂裳而天下從。豈難也哉。王卽皇帝位。百官陪列。引導升御牀。共坐。導固辭。至於三四。帝猶不許。導曰。若太陽下同萬物。蒼生何由仰照耶。乃止。進驃騎大將軍。儀同三司。論擊華軼功。封武岡侯。進侍中。司空。假節。錄尙書事。領中書監。太興初。劉隗用事。帝漸疎敦導。導任眞推分。淡如也。敦反。隗勸帝悉誅王氏。導率羣從子弟二十餘人。每旦詣臺謝罪。帝命導朝服召見之。導稽首謝曰。逆

臣賊子何世無之不意近出臣族帝跣而執其手曰
茂宏方托百里之命於卿是何言耶乃詔曰司空導
以大義滅親可以吾爲安東時節假之元帝崩明帝
卽位導受遺詔輔政遷司徒王敦復反舉兵向闕敦
時始寢疾導便率子弟發哀衆素憚敦聞其死人人
自奮帝討敦假導節都督諸軍領揚州刺史敦平進
封始興郡公邑三千戶賜絹九千匹進位太保劍履
上殿入朝不趨讚拜不名明帝崩復與庾亮等同受
遺詔輔成帝加羽葆鼓吹班劍二十人石勒侵阜陵
加導大司馬假黃鉞討之軍次江寧帝親餞於郊寇

退解大司馬庾亮將徵蘇峻。謀之於導。導不可。曰。峻之猜險。非一日矣。召而奉詔。可也。召而不奉詔。公其若之。何亮弗聽。召峻而峻果反。六軍敗績。亮出奔。導入宮侍帝。峻逼乘輿。幸石頭。導爭之。不得出奔於白石。峻既挾帝與王師大戰。燔宗廟宮室。賊平。溫嶠議遷都豫章。三吳之豪請都會稽。導曰。建康古之金陵。孫仲謀。劉元德俱言王者之宅。古之帝王不必以豐儉移都。苟崇衛文大帛之冠。則何往不可。若不續其麻。樂土爲墟矣。且北寇游魂伺我之隙。一旦自竄於蠻越。示弱於天下。特宜鎮之以靜。則羣情自安。由

是羣議乃息。當是時，帑藏空虛，庫中惟有練數千端，鬻之不售。而國用不給，導患之。乃與朝臣俱制練布，單衣士人，翕然競服之。練遂貴，令主者出賣，端至一金。其爲時所愛慕如此。六年冬，蒸詔歸胙於導，命無下拜。導辭疾不敢當。帝初幼冲，見導恆拜，其手詔曰：「惶恐言。」中書造詔曰：「敬問。」導入。帝與導有羸疾，不朝。帝幸其第，縱酒作樂。後令輿車入殿，進位太傅，拜丞相。冊曰：「朕夙罹不造，肆陟帝位，未堪多難，禍亂旁興。公文貫九功，武經七德，外緝四海，內齊八政，天地以平，人神以和，業同伊尹，道隆姬旦，仰思唐虞，登庸雋。」

又申命羣官。允釐庶績。朕思憑高謨。宏濟遠猷。惟稽
古。建爾於上。公永爲晉輔。往踐厥職。敬敷道訓。以亮
天工。不亦休哉。公其戒之。導輔翊三朝。尊寵無比。而
簡素寡欲。倉無儲穀。衣不重帛。其善於因事。不好爲
更端。朝野安之。爲中興賢相。庾亮鎮荊州。遙執朝權。
據上游。擁彊兵。趣向者多歸之。導內不能平。常因西
風塵起。舉扇自蔽。徐曰。元規塵汚人。旣而南蠻校尉
陶稱。構導於亮。亮欲舉兵廢導。或勸備之。導曰。吾與
元規休戚是同。悠悠之談。宜絕。知者之口。卽如君言。
元規來。吾便角巾還第。復何懼哉。又與稱書。庾公元

舅也。宜善事之。讒閒遂息。漢魏以來。羣臣不拜山陵。導以元帝睭同布衣。每一登進。皆就拜。不勝哀感。由是詔百官拜陵。自導始也。咸康五年薨。年六十四。帝舉哀於朝堂三日。遣大鴻臚持節監護喪事。贈襚之禮。一依漢博陸侯及安平獻王故事。及葬。給九游輜輶車。黃屋左纛。前後羽葆鼓吹。虎賁班劍百人。諡曰文獻。導六子。悅、恬、洽、協、劭、薈。

悅字長豫。性至孝。導甚愛之。導嘗與悅奕棋。爭道。導笑曰。相與有瓜葛。那得爲爾耶。導性儉。帳下甘果爛敗。令棄之。云勿使大郎知。悅少侍講東宮。歷吳王友。

中書侍郎先導卒。諡貞世子。初悅與導語。恆以慎密。爲端導還臺。及行。悅常送至車後。又恆爲母曹夫人。襃斂箱篋中物。悅亡。導還臺。自悅常所送處哭至臺門。母曹長封作篋。不忍復開。悅無子。以弟恬子琨爲嗣。襲導爵。丹陽尹。卒。贈太常子。嘏嗣。尙鄱陽公主。歷中領軍。尙書。卒。子恢嗣。義熙末。爲游擊將軍。

恬少好武。不爲公門所重。襲爵卽邱子。性傲誕。謝萬嘗造恬。旣坐。少頃。恬入內。久之。沐頭散髮而出。據胡牀於庭中。曬髮。竟無賓主之禮。萬亦不謝而歸。晚節更好士。遷中書郎。帝欲以爲中書令。導不可。乃拜魏

郡太守加給事中導薨去官起爲後將軍轉吳國會稽內史加散騎常侍卒贈中軍將軍

洽字敬和導諸子中最知名弱冠拜中書郎歷中軍長史建武將軍吳郡內史徵拜領軍加中書令固讓穆帝詔曰敬和清裁貴令昔爲中書郎吾時尚少數呼見意甚親之今所以用爲令旣機任須才且欲時時相見共講文章待以友臣之義而累表固讓甚違本懷其催洽令拜洽竟不受升平二年卒於官年三十六二子珣珉珣字元琳小字法護性機警弱冠能屬文初爲桓溫主簿溫甚重之溫經略中原無寧

歲軍中機務。悉委珣。文武數萬人。珣一見。卽識其面。從討袁真。封東亭侯。轉大司馬。參軍。中軍長史。給事黃門侍郎。出爲豫章太守。不之官。除散騎常侍。不拜。遷祕書監。侍中。時孝武帝雅好典籍。珣與殷仲堪。徐邈。王恭。郗恢等。竝以文章。參侍左右。未幾。出爲吳國內史。有惠政。王國寶媚於會稽王道子。而與珣等不協。帝慮萬歲後。怨隙必生。因出恭。恢爲方伯。而召珣爲尙書右僕射。領吏部。轉左僕射。加征虜將軍。珣夢人以大筆如椽與之。旣覺。語人曰。此當有大手筆事。俄而帝崩。哀冊諡議。皆珣草也。隆安初。國寶用事。謀

黜舊臣。遷珣尚書令。王恭入赴山陵。欲誅國寶。珣止之曰。國寶雖終爲禍亂。今罪逆未彰。公擁彊兵竊發於京輦。人將謂公反。國寶若遂不改惡布天下。然後順時望誅之。亦無憂不濟也。乃止。恭尋舉兵討國寶。國寶將殺珣。不果。道子殺國寶以謝恭。恭乃罷兵。二年。恭復反。假珣節。進衛將軍。事平。上節加散騎常侍。四年。以疾解職。歲餘卒。年五十二。追贈車騎將軍。開府。初。珣與弟珉皆娶謝氏。旣而離婚。與謝氏有隙。及太傅薨。珣謂族弟獻之曰。吾欲哭謝公。獻之曰。固所望於法護也。遂直前哭之。甚慟。珣五子宏。虞。柳。孺。曇。

首宋世竝有名。珉字季琰，善行書，名出珣右。歷著作散騎郎、國子博士、黃門侍郎、侍中，代獻之爲長，兼中書令。二人素齊名，世謂獻之爲大令，珉爲小令。太元十三年卒，年三十八。二子朗、練，義熙中竝歷侍中，協襲爵武岡侯。早卒，無子。以弟劭子謐爲嗣。謐少爲祕書郎，襲爵，歷中軍長史、黃門郎、侍中。劉裕爲布衣人未之識也。惟謐獨奇之，謂裕曰：「卿當爲一代英雄。」桓元反，謐奉詔使元。元以爲中書令，領司徒。元篡，以謐兼太保，奉璽冊詣元。劉裕破元，謐以本官加侍中，領揚州刺史，錄尚書事。謐旣受寵，桓氏常不自安。而

護軍將軍劉毅又問謚曰。璽綬何在。謚益懼。未幾而卒。三子。瓘。球。琇。入宋皆至大官。
劭字敬倫。美姿容。歷東陽太守。吏部郎。遷尚書僕射。領中領軍。卒。贈車騎將軍。三子。穆。默。恢。穆臨海太守。默吳國內史。恢右衛將軍。而穆三子。簡。智。超。默二子。鑒。惠。義熙中竝歷顯職。

蒼少除吏部郎。歷官吳國內史。江州刺史。加散騎常侍。卒。贈衛將軍。子。廞。歷太子中庶子。司徒左長史。廞子。華。初王導渡淮使郭璞筮之。卦成璞曰。吉無不利。淮水絕。王氏滅。其後子孫繁衍。竟如璞言。